

四庫全書

史部

欽定四庫全書

聖祖仁皇帝親征平定朔漠方略卷二

康熙十九年二月庚午兵部督捕理事官拉都

虎覆奏吳喇忒被劫事拉都虎奏言

臣奉

命至巴圖爾濟農所察訊劫掠吳喇忒事濟農言我

蒙

聖恩許我由水泉過邊往見我兄我乃擅在大草灘游
牧方以不免罪戾是懼敢劫掠吳喇忒乎前額

爾德尼和碩齊與我同來畱六日即去聞其率
兵四百往劫今尚在土謝圖汗之地游牧我試
遣人追其所劫人畜以報臣因待之嘉峪關越
四旬得歸者十八人臣復至濟農所令遣使召
額爾德尼和碩齊面詰之至則曰我等爲噶爾
丹所敗拋棄妻子挈楚呼爾吳巴什之孫慙都
台吉來奔饑不能自存遊行捕獵至吳喇忒之
地殺奪人畜是實此事濟農等皆不知所掠人

口除送到之外餘者已他售矣實無力償補因叩頭祈免死時濟農之弟羅卜臧台吉曾在寧夏相近毛明安地方劫掠馬匹濟農因屬下人等先曾劫掠鄂爾多斯牲畜遂向其弟查取馬百二十匹交臣謹一併奏

聞

上曰巴圖爾濟農既未行劫可勿罪額爾德尼和碩齊已檄噶爾丹令其收捕俟覆奏到日再議其察獲

人口馬匹理藩院遣官交與被掠之部

康熙二十年八月辛丑喀爾喀羅卜臧台吉仍舊制入貢順治十二年設立喀爾喀八扎薩克獻納年貢羅卜臧台吉其一也康熙元年右翼扎薩克圖汗與羅卜臧台吉等內自相亂扎薩克圖汗旗破身亡而羅卜臧台吉避入厄魯特噶爾丹部下九年

特旨以扎薩克圖汗之子襲爲扎薩克圖汗而封阿

海台吉之子阿海帶青爲遵義盆楚克台吉授
爲扎薩克各賜

勅印獻納年貢至是噶爾丹送羅卜臧台吉歸扎薩
克圖汗扎薩克圖汗以羅卜臧台吉向係扎薩
克仍令循舊制入貢奏至

上允之

乙巳巴圖爾額爾克濟農遣使進貢請罪巴圖
爾額爾克濟農疏曰

寶體居四海之中如須彌之固仰思

儀範定得休和厄魯特時值大壞不能存活特來歸

命原無違悖

聖主之心祇以竊取牲畜深自悔罪思欲賠償因將他
人所掠吳喇忒人口寧夏馬匹竭力湊納伏乞
聖主鑒而憐之奏至

諭曰此案前曾檄諭噶爾丹未經覆奏著將原由明
白開列再行檄諭俟覆奏到日再議貢物著察收

九月辛未

命外藩蒙古王等議弭盜之策

國家恢宏景運式廓疆宇自

祖宗以來節次收服察哈爾科爾沁阿祿科爾沁巴林杜爾伯特扎賴特郭爾羅斯土默特喀喇沁敖漢奈曼翁牛特扎魯特克西克騰四子部落烏朱穆秦阿霸垓蒿齊忒阿霸哈納爾蘓尼特吳喇忒鄂爾多斯喀爾喀毛明安歸化城土默特蒙

古諸部落一體編立旗分佐領布列塞外兼容
並育救災卹患所以撫綏之者甚至至是以諸
蒙古盜賊竊發不安其生

諭大學士覺羅勒德洪明珠等曰烏朱穆秦等各旗
蒙古住牧於喀爾喀巴爾虎之間先竊彼兩地馬
畜以致喀爾喀巴爾虎等亦盜竊其馬畜以報之
曩無盜賊時驅馬北至涼地牧養肥壯收回儘可
度冬自盜賊繁興夜間不敢放馬拘於欄柵中牢

籠防護馬不得肥以致不能度冬斃者甚多且喀爾喀巴爾虎等結黨行竊夜襲邊汛我汛地之人畏懼四五汛併居一處兩汛之間或距一日二日之程其間盜賊公行出入此汛雖覺不能立即達知彼汛且貧窮蒙古馬畜被竊急報該王貝勒及總統扎薩克等間有不肖者或貪飲沉醉不即遣人緝拿詳細察究縱有首告置若罔聞耽延時日有報一馬被竊者守候食費竟至數馬今有馬被

竊不敢舉首多行隱匿誠以此也朕聞之深爲惻然軫念作何籌畫得以屏息盜賊貧窮者各遂其生其令議政王貝勒大臣蒙古內大臣散秩大臣及來朝貢之外藩蒙古王以下一等台吉以上公同詳議具奏議政王大臣等奏曰外藩蒙古王貝勒公台吉等言

聖諭誠是祇因臣等庸劣不能管轄所屬部落以致盜賊生發屬下蒙古失其生計

皇上軫念欲使各遂其生臣等感激靡涯以臣等愚意

各汛地應多增人數嚴密防守向來守汛不用
內地十旗之兵今此十旗亦應照各旗一體守
汛遇有馬畜被竊等事告之該扎薩克立即准
行一切事件俱限日歸結違則嚴加治罪又圖
納黑公議云蒙古遊牧地方之外邊汛之內各
形勝處應屯兵百許掘濠障守查緝外賊之入
內賊之出盜賊似可屏息又蒙古內大臣議云

凡汛哨俱按該管旗分地方安置嗣後管扎薩克之諸王貝勒貝子公台吉等果能撫養旗人屏息盜賊俾屬下蒙古各得其生則進級議叙如該旗盜賊繁多屬下流離貧困則酌議治罪
奏入

諭曰喀爾喀各旗蒙古向來敬慎職貢本朝無故添汛置戍於理未洽其一切事件限日歸結所議誠是也朕思喀爾喀等歷世恭順往來進貢殊堪憐

憫應遣賢能大臣前往喀爾喀厄魯特處大加恩
賚以示柔遠至意即令遣往之大臣諭以前此內
地蒙古盜竊馬畜以致喀爾喀巴爾虎亦行報復
彼此互相盜竊不已其內地蒙古已經嚴察禁飭
外爾等所屬亦應嚴加約束爾地亦宜設汛置哨
遇有盜竊兩汛互相覺察議政王貝勒大臣蒙古
大臣並外藩蒙古王等奏曰

聖諭允當靡不包舉非臣等愚見所能及也欽遵

諭旨行之不但寇盜息而貧窮蒙古各遂其生即喀爾喀厄魯特等荒服之國愈仰戴

浩蕩鴻恩於無盡矣

康熙二十一年七月乙卯

命大臣台吉等往使厄魯特喀爾喀先是

上以三逆蕩平武功耆定將

親詣

盛京告祭

改寢

諭大學士覺羅勒德洪明珠等曰今天下乂安應遣
大臣使厄魯特喀爾喀大加賞賚俟盛京回日時
和草青舉行洎禮成還京議政王大臣等奏請遣
使擇吉起行得

旨厄魯特噶爾丹博碩克圖汗著內大臣祁他特一
等他布囊俄齊爾一等侍衛覺羅孫果御前侍衛
阿南達員外郎恩格森喇嘛薩木坦格隆去喀爾

喀左翼土謝圖汗著領侍衛內大臣伯費揚古一
等台吉額駙阿喇卜灘護軍叅領巴圖郎中喀喇
去折卜尊丹巴庫圖克圖著大喇嘛垂重格隆去
車臣汗著散秩大臣波羅特一等台吉吳爾圖納
蘇圖一等侍衛溫達郎中色稜去額爾克帶青諾
顏著精奇尼哈番副都統班達爾沙二等台吉額
駙諾木齊一等侍衛薩哈達員外郎鄂齊爾去墨
爾根諾顏著內大臣壽世德副都統楊代四等他

布囊索寧員外郎胡什巴去右翼扎薩克圖汗著
都統阿密達二等台吉根敦什希卜一等侍衛班
第員外郎偏圖去盆楚克台吉著內大臣覺羅吳
默納一等他布囊鄂摩克圖一等侍衛馬塔員外
郎達賴去額爾德尼濟農著都統宗室拉克達二
等台吉扎木揚護軍叅領庫蘇纍員外郎馬廸去
色稜阿海台吉著一等侍衛拜音察克一等台吉
拉第長史佛保員外郎巴朗去達爾馬希里諾顏

著一等他布囊鄂齊爾前鋒叅領扎木蘇長史河
洛主事齊蘭保去羅卜臧台吉著一等侍衛多爾
濟扎卜二等台吉額林辰長史哈納米員外郎桑
格去尋令議所賞禮物厄魯特噶爾丹博碩克圖
汗喀爾喀土謝圖汗車臣汗額爾克帶青諾顏
墨爾根諾顏扎薩克圖汗盆楚克台吉色稜阿
海台吉額爾德尼濟農達爾馬希里諾顏羅卜
臧台吉每人各賞以貂皮蟒袍黑貂大褂茜黑

貂帽珊瑚素珠各一件皮靴緞襪各一雙鑲嵌
松石鞵帶一圍手巾合包小刀牙筒俱全鑲嵌
松石珊瑚撒袋一副弓矢俱全鑲嵌松石珊瑚
金茶桶鍍金籊銀飯桶銀盆各一具茜黑貂皮
獺皮豹皮虎皮海豹皮各五張茶九簍大小綵
緞各九十疋毛青三梭布各九百疋又喀爾喀
折卜尊丹巴庫圖克圖賞以大手帕七副玉瓶
有柄玉碗珊瑚素珠鏤金雕鞍鑲嵌松石珊瑚

金茶桶鍍金箍銀飯桶銀盆各一具茜黑貂皮
獺皮豹皮虎皮海豹皮各五張茶九簍大小彩
緞各九十疋毛青三梭布九百疋頒行

上召祁他特費揚古等諭曰爾等俱係貴顯之臣凡事
須仰副盛典以正大行之爾等皆屬一體勿以滿
洲蒙古各分彼此務須同心協和滿洲大臣不諳
蒙古語言凡議事爾台吉他布囊等譯宣於滿洲
大臣一同商酌確妥對答之勿致失言爾等所言

伊等所答及一切傳聞事件俱錄之來奏至內地
蒙古向與喀爾喀互相盜竊以致盜風大作如妄
行作亂生事者各自擒拿懲究盜何自生盜賊既
弭則牲畜可以散放牧養牲畜既肥則入冬不瘦
春時孳孕無復可虞誠如是蒙古何至貧困又加
以各置汛哨遇有妄行作亂之人即從公究處則
民庶得安其生矣其以此曉諭之祁他特等奏言
勅書賞物臣等作何交授伏請

訓旨

上曰朕念厄魯特喀爾喀累世恭順恪修職貢今以海
宇昇平乘此閒暇特遣爾等往賫重賞優加恩賚
並無他故我朝威靈德意天下外國無不知之者
諒厄魯特喀爾喀必大加恭敬然伊等向行之例
俱用蒙古禮今若凡事指授而去或致相岐行事
反多滯礙爾等皆遴選而使者凡事務須仰副盛
典各持大體隨宜而行地方遙遠不及逐一指授

厄魯特喀爾喀依彼蒙古之例大加尊敬則已祁
他特等又奏曰厄魯特喀爾喀之汗貝勒有赴
達賴喇嘛或至他處者則待之手

上曰在旬日半月內歸者則待之如遲則不必待誰爲
之首即交爲首之人而來多爾濟扎卜等奏曰近
聞人言羅卜臧台吉已爲扎薩克圖汗所執如
其說果真則

勅書賞物將如之何

上曰爾等可於沿途細加採探如果被執爾等即歸可
也多爾濟扎卜等又奏曰羅卜臧設有子弟代襲

則

勅書賞賚可與之手

上曰不可與也雖有子弟代襲須喀爾喀通國保奏授
爲扎薩克准納九白之貢始可加以恩賚且部中
向有定例和他特等奏曰理藩院移文令臣等查
詢定議收捕額爾德尼和碩齊巴圖爾額爾克

濟農等并給發貢使符驗之事伏請

訓旨

上曰此無庸多議也額爾德尼和碩齊等如係噶爾丹屬下即限日收捕如非彼屬下不能收捕我朝另有裁奪至給發貢使符驗前已諭檄噶爾丹矣近見來使有給符驗者亦有不給符驗者何項人等給以符驗須詢明至無符驗不准放入之例亦明白曉諭之祁他特等奏曰厄魯特喀爾喀等於

臣

等回時欲遣使同行則與之偕來乎

上曰如無粗重囊橐途次無所耽延則與之同來

上又諭曰爾等行路如馬駝等物被小盜偷竊當優容

之勿令追賠更須約束隨從人等毋使妄行爭鬪

厄魯特喀爾喀有至爾等旅寓者須以禮貌和藹

接待之和則可識其心志祁他特等又奏曰厄魯

特喀爾喀如因

皇上重加恩賚有所餽遺

臣

等可受之乎

上曰受之

賜厄魯特噶爾丹博碩克圖汗

勅曰朕惟自古帝王統馭寓內遐邇同仁無分中外
需恩膏於萬邦布聲教於四海其歷年久遠誠敬
職貢者愈加隆眷優錫殊恩爾噶爾丹博碩克圖
汗自爾父兄歷世相承虔修禮好敬貢有年延及
爾身篤盡悃忱往來不絕殊爲可嘉朕久欲加恩
賚以示優恤至意祇以幾務殷繁是以未逮茲海

宇昇平惠澤宜溥特遣大臣侍衛官員等賞捧重
賞大需恩施爾承此寵錫當益戴德意殫心敬順
以仰副朕柔遠同仁協和萬邦之至意

賜喀爾喀汗濟農諾顏台吉等

勅亦如之

八月己卯

詔停羅卜臧台吉賞奉使侍衛多爾濟扎卜台吉額
林辰等至張家口外空郭爾鄂波之地遇厄魯

特噶爾丹貢使薩拉克圖爾問羅卜臧台吉爲
喀爾喀扎薩克圖汗所執果有此事否其同來
布庫班第係扎薩克圖汗之人對曰羅卜臧欲
與俄羅斯合謀攻我汗我汗遣其子率兵萬人
於今歲二月終旬夜乘羅卜臧酣寢執之其屬
下人俱爲俘擄財物及馬駝牛羊俱爲我軍所
獲我曾執纛隨行此目擊之事也多爾濟扎卜
等據此奏報得

旨羅卜臧台吉被執既真爾等携賞物即回

乙酉督捕理事官拉都虎以龍頭山形勢覆奏
先是厄魯特噶爾旦巴台吉之子鄂齊爾圖汗
之孫羅卜臧滾卜疏稱我祖父向曾往來入貢
後以內亂往依達賴喇嘛今幸得稍寧伏乞

皇上俯鑒我等饑渴撫而恤之請率所轄居龍頭山之
地理藩院轉奏得

旨此龍頭山在邊關何處自邊關行幾日可到與內

地有闕否或向係邊外無用之地否著即檄拉都
虎察明原委作速奏報至是拉都虎覆奏曰蒙古
稱龍頭山謂之阿喇克鄂拉乃甘州城北東大
山之脉絡綿衍邊境山之觀音山口即邊關也
距甘州城三十里距山丹城三里其夏口城距
山口而建自夏口城至渰川堡相去五里山盡
爲寧遠堡此堡在邊外龍頭山與寧遠堡相去
里許其間有長寧湖界之蒙古所謂鄂爾通也

寧遠堡有內地人民種植輸賦沿湖則兵民牧
養焉今諸蒙古俱於龍頭山北游牧羅卜臧滾
卜之意欲占長寧湖耳邊汛要地似不宜令不
諳法紀之蒙古居住理藩院兵部議以羅卜臧
滾卜所請應不准行

報可

九月癸亥巴圖爾額爾克濟農償解盜竊馬匹
巴圖爾額爾克濟農疏曰厄魯特時值敗壞饑

餓來歸蒙

皇上帡幪之庇得居邊境不意屬下人等不知法紀妄
行盜竊悔罪無及除將額爾德尼和碩齊所掠
人口追還上納外其竊馬人等窮困已極不能
償還臣與衆屬裔竭力捐輸共得馬百匹解送
交納伏乞

聖主睿鑒又臣之屬裔貧困無聊寧夏地方與臣相近
伏懇

天恩許在寧夏貿易理藩院議應檄諭巴圖爾額爾克
濟農將盜竊鄂爾多斯馬羣人等照彼例治罪
缺解馬匹補償完日將巴圖爾額爾克濟農一
併從重議處現解馬匹交發鄂爾多斯旗下其
寧夏地方向無厄魯特喀爾喀貿易之例所請
不准行議上

諭曰巴圖爾額爾克濟農等自本地敗奔來至邊境
因不諳法紀迫於饑困盜竊牲畜等物今陳其苦

情諄諄奏請可將追償缺解馬匹并議處之處俱行寬免仍移文嚴禁嗣後毋得違法妄行生事此文即發拉都虎轉行曉諭之餘如所議

十二月癸未喀爾喀汗等奉表謝

恩領侍衛內大臣伯費揚古等賚

勅至喀爾喀諸部汗及濟農諾顏台吉感戴

皇仁優加

恩賚各遣使護送

欽使大臣等還朝併各遣子弟台吉來京代

覲奉表謝

恩其詞曰瓦察喇土謝圖汗等謹奏

聖明皇帝陛下

宏仁遠被剪滅諸兇

道法廣施救寧庶類奠興圖於鞏固大振

天聲握智慧之寶珠覃敷

聖化

恩施下逮曷任懽欣敬奉表牋上貢方物奏至

上命給賞如順治十四年例且以

御服貂裘賜之

康熙二十二年七月戊戌使厄魯特內大臣祁
他特等還以其使臣來覆

命祁他特等奏曰臣等將至厄魯特之地先遣薩木

坦格隆等前往於十一月二十八日至薩爾巴

爾兔地方薩木坦格隆等回報曰我等已見噶

爾丹言遣使之故噶爾丹云

中國使臣從無臨我厄魯特者今聞遣使前來不勝
欣悅爾明日可即起行我亦遣人往迎其來迎
之人格塞爾尋至十二月初十日至茅西口噶
爾丹又遣其寨桑色稜來迎設筵以待饋臣等
四人馬各一匹給驛馬九十匹駱駝十頭及食
用羊隻二十四日至齊齊哈止宿噶爾丹又遣
其寨桑車臣來迎車臣以其私問曰自古以來

從無遣使涉我地者今來有何事

勅內辭意可得聞乎

臣等曰

勅辭並無他故今天下太平乘此閒暇特沛

皇仁大加賞賚我等明日即到如何迎接如何行禮汝

仍先來迎告以便交授

勅書及賞賚幣物次日既近噶爾丹所居噶爾丹遣

其格塞爾來告曰本當即與

中國使臣相見受賞但自古及今從無使來今乃初

次應擇吉受之臣等曰

天子勅書所到之處當即祇領今既欲擇吉當少待之
將所擇日期并如何行禮之處即來告我頃之
格塞爾以其汗之言來告曰擇以二十八日爲
吉中國禮繁我國禮簡而易中國部臣受之上
奏一月後方行

賜宴我國雖無部院而有寨桑若使寨桑接受是行
中國之禮也如我國之禮則使臣以

勅書并賞賚諸物親授我汗我汗親身受之至二十

八日臣等賚

勅書並賞賚諸物進噶爾丹所居帷幕見噶爾丹膝
席以俟及交

勅書噶爾丹俯身兩手受之其衣服等物則彼左右
之人受之其器用幣帛等物并駱駝牽入一一
展視受之臣等傳

旨問噶爾丹無恙噶爾丹語其近坐之喇嘛曰幸無

恙敢請

皇上起居 臣等答曰

天子萬安既坐噶爾丹問曰聞中國有寇亂遲至數年
始滅其信然乎 臣等答曰比年曾有寇盜竊發
我

天子仁慈恐用兵擾民故漸次收服者有之勦滅者有
之今已盡皆底定矣若似爾地曠野何至持久
耶噶爾丹又曰聞遣八人至唐古特國習其文

有學至精妙者乎

臣

等曰有學至精妙者乃設

宴宴畢歸於旅次二十九日請觀喇嘛作儼舞

臣

等往閱之正月朔日請聽喇嘛講經講畢噶

爾丹即邀入所居幕中設筵凡三日至初九日

臣

等召寨桑車臣吳爾占扎卜至將部發查訊

額爾德尼和碩齊巴圖爾額爾克濟農之文授

之曰此項事情先已檄行兩次並無回文故因

我等此來之便令定議如額爾德尼和碩齊巴

圖爾額爾克濟農係爾屬下人當限日收捕照
例治罪賁罰贖送部若非爾屬下人或不能收
捕我

朝另有裁奪頃之寨桑車臣等以其汗之言來告曰
前所行兩檄信有之第以爲部文所以未答今
諸大臣稱係

聖旨敢不以覆額爾德尼和碩齊者原係我屬下人得
罪而逃至中國又復獲罪可往擒之其屬產等

項悉聽

上裁至額爾德尼和碩齊本身乞以畀我臣等曰額爾德尼和碩齊獲罪於中國乃欲擒彼與汝是何言耶且汝等止言及額爾德尼和碩齊而巴圖爾額爾克濟農與汝無涉乎車臣曰請以此再告我汗頃之來覆曰額爾德尼和碩齊巴圖爾額爾克濟農皆我所屬此二人已歸達賴喇嘛我當遣人往召之倘如命而至我治其罪爾等

遣人來取罰贖若復他遁則無如彼何也臣等

令彼約期期以丑年四月

臣

等曰歲內可結之

案何緩至三年乎曰遣人至額爾德尼和碩齊

巴圖爾額爾克濟農處往返約須一年倘不能

即結勢必遣使前往達賴喇嘛并達賴巴圖爾

處道路遙遠不能不緩其期期內或得即結亦

未可定

臣

等曰額爾德尼和碩齊等向在邊境

作亂但念汝等職貢年久所以姑待今約期既

遠其間未必又不作亂也彼稱噶爾丹之言曰
其間或又作亂一惟

上裁

臣

等又謂之曰去年七月有稱爲汝汗之姪丹津
溫卜之使者並無符驗前來進貢汝處何項人
等給之符驗何項人等不給符驗彼復稱噶爾
丹之言曰我遣使請

安進貢必有印文至我屬下之人各處貿易潛至中
國冒稱我使亦未可定且杜爾伯特圖爾古特

和碩特等部落雖皆在我屬下其居住遙遠不
便取我符驗我亦不及給之且伊等向來亦不
用符驗也自今以後我若遣使當用印文開註
年月日期而遣之臣等曰汝母弟子姪等各自
遣使往來汝給以符驗否乎荅曰此無庸給符
驗也我有三印若非此印即非我使也臣等曰
汝母與弟及子姪等若無汝符驗則不准入關
汝知之乎曰准入關與否一惟

上裁至十九日臣等召吳爾占扎卜至謂之曰我等將

於二十一起行矣其以我馬駝來吳爾占扎

卜稱其汗之言曰願畱一二日至二十一日臣

等又召寨桑等至語之曰我等奉

命而來不便久待越翼日行矣彼又稱噶爾丹之言

曰道里遙遠蒙

皇上俯念特遣使至諸大人起行之事我知之矣至二

十三日設筵以餞臣等於正月二十七日起行

噶爾丹博碩克圖汗遣其額爾克格隆察汗溫
卜卓禮克圖溫卜盆楚克等四人貢馬四百匹
駱駝六十頭貂皮三百銀鼠五百舍利孫皮三
張沙狐皮一百黃狐皮二十活雕一隻貼金牛
皮五張厄魯特鳥鎗四桿隨臣等來謝

恩祁他特等又疏曰臣等去年十二月初至噶爾丹
地方有歸化城都統顧慕德所屬班達爾善之
子巴朗來投臣等告曰我於康熙十八年正月

自歸化城歸途遇厄魯特所使寨桑阿卜都額爾克同入貢之格楚爾者將我細縛帶至地今聞大人至此特來相投臣等召其寨桑臣等語之故且曰此巴朗乃

天朝另戶之民非人家僕也其格楚爾以汝國例治何罪車臣復告曰我汗言當拘格楚爾訊越數日問之言格楚爾已他往矣早晚即歸至十八日尚無覆臣等曰我等即日起行格

爾事曾訊之否車臣等往見其汗來告曰格
爾已回又復去矣以此觀之其所行之事是
故避去耳但我國一切罪犯從無殺之之例
罰格楚爾以十五九牲畜乞諸大人稍候帶
臣等言我等奉差頒

恩賞而來並非來取罰贖其妄行之人令汝等懲
聞之於我我等不便等候俟有貢使之便將
贖附解可也疏入得

旨令議政王貝勒大臣等逐一詳議議曰噶爾丹博碩克圖汗累代進貢往來通好今將

勅書賞物照彼蒙古禮接受恭請

聖安又稱嗣後遣使俱給用印符驗填註年月日期應無庸議其額爾德尼和碩齊等事約以丑年四月爲期約期之內如仍復作亂悉聽

皇上聖裁應俟所期之年再議攜回之巴朗交都統顧慕德其格楚爾應俟照彼國例治罪將罰贖牲

畜解送到日所司再議

上從之

九月戊寅

命拉都虎回京理藩院以鄂爾多斯多羅貝勒宋拉
卜報稱厄魯特之巴圖爾額爾克濟農移近黃
河對岸游牧請遣官往會宋拉卜等諭令退回
奏入得

旨不必遣官其以此情節檄發拉都虎曉諭退回拉

都虎久勞於外事畢令竟來京回奏

癸未

命宣諭厄魯特噶爾丹約束貢使

勅曰自聲教既一以來爾歷世相承虔修職貢聘問
有年朕嘉爾盡心敬順往來不絕故向來爾處所
遣之使不限人數一概俱准放入邊關前此來使
無多且頭目人等善於約束是以並無妄行作亂
者比年爾處使來或千餘人或數千人連綿不絕

沿途往回搶奪塞外蒙古馬匹牲畜進邊之後任
意收放牲畜踐食田禾網縛平民搶掠財物妄行
者甚多邊外蒙古與內地百姓非不能相拒報復
祇以凜遵朕之法度耳朕俯念爾等素行恭順不
將若輩照內地律例究處以致妄行殃民日以益
衆用是限定數目放入邊關嗣後爾處所遣貢使
有印驗者限二百名以內准入邊關其餘俱令在
張家口歸化城等處貿易其向來不用爾處印驗

另行納貢之厄魯特噶爾馬帶青和碩齊和碩特
之博洛庫濟台吉杜爾伯特之阿爾達爾台吉圖
爾古特之阿玉奇台吉等所遣貢使放入邊關者
亦不許過二百人爾噶爾丹博碩克圖汗尚毋違
朕視四海一家中外一體至意敬慎遵行嗣後遣
使必選賢能頭目嚴行約束若仍前沿途搶掠殃
民作亂即依本朝律例傷人者以傷人之罪罪之
盜劫人財物者以盜劫之罪罪之特此先行曉諭

爾其知之

十一月壬申

勅諭喀爾喀毋越境遊牧喀爾喀土謝圖汗車臣汗
額爾克帶青諾顏墨爾根諾顏各遣子弟請
安入貢並口奏曰去歲蒙

皇上諭令各牧地設立汛哨以警寇盜但我等就草游
牧居止不定難以置哨

聖上限以何處爲界請遵

旨而行理藩院議曰康熙三年七月內喀爾喀等越
噶爾拜瀚海之地前來游牧

皇上軫念邊境地方亂之所生皆由於此

特遣都統畢力克圖等賚


勅於車臣汗丹津喇嘛令其曉諭部下屬衆毋許越
境游牧今亦應撰寫

勅書賚發曉諭

上是之

勅曰爾喀爾喀等向來不越噶爾拜瀚海之地游牧
康熙三年七月內爾等越界而來朕念亂之所生
皆此之故故特頒勅旨曉諭爾等部下屬衆迨後
喀爾喀間有一二違禁來近境遊牧以致逃盜紛
紛不絕故令爾等設哨立界今爾等既稱就水草
遷徙居止不定難以置哨請限以何地爲界可停
其置哨限以噶爾拜瀚海爲界不得越此遊牧噶
爾拜瀚海之地距我邊境有三日程其瀚海盡界

之東亦須離我邊境三日之地不得內入朕視天
下爲一體率土之人靡不撫恤我邊境地方芻牧
美好朕亦知之若喀爾喀或遇災旱芻草不生必
不得已具奏請旨方可內向遊牧俟草生時仍回
原處如不請旨擅入內地即令我邊地官兵驅逐



聖祖仁皇帝親征平定朔漠方略卷二

欽定四庫全書

史部

平定朔漢方略卷三至五

詳校官編修臣曹振鏞

編修臣裴謙覆勘

總校官進士臣繆琪

校對官中書臣朱圻

謄錄監生臣陳昌敬

欽定四庫全書

聖祖仁皇帝親征平定朔漠方略卷三

康熙二十三年二月庚子

上遣阿齊圖格隆等賞

勅諭達賴喇嘛先是喀爾喀右翼扎薩克圖汗兩次
陳奏疏言自康熙元年羅卜臧變亂以來我弟
兒子姪多投左翼屢索不還曾往訴達賴喇嘛
蒙諭七旗曰扎薩克圖汗爾七旗當共尊之其

變亂以來子弟人民流入左翼者俱應發還因
差扎爾布奈前來蒞盟乃土謝圖汗不至

皇上係我大衆之主謹以此情上

聞至是

上念喀爾喀累世恭順職貢有年不忍其子弟人民離

散遣阿齊圖格隆等賁

勅往諭達賴喇嘛令其遣使議和

勅曰朕統御寰區願中外無征戰之勞離散之苦使

羣生皆臻安樂近者喀爾喀扎薩克圖汗屢次疏
言右翼子弟人民離散奔入左翼索之未還等語
爾喇嘛從來積大福力永遠真誠慈悲濟衆聲聞
炳著無不欽其高行而讚頌之者喀爾喀諸汗貝
子皆供奉爾喇嘛信爾之教而尊其道法爾於本
朝亦誠心敬慎進貢往來不絕今天下共享太平
而扎薩克圖汗人民離散未得完聚朕心大爲軫
惻念其中必有父子兄弟骨肉分離者未必不生

事互殺交相戰爭兵戎一起姑不論人民困苦即
兩汗亦豈能並存伊等於朕向來恭順竭誠奔走
於爾喇嘛亦爲護法久矣何忍默視使至此極乎
朕與爾俱當遣使往諭將扎薩克圖汗離散人民
給還俾兩翼永歸於好既副朕一視同仁之至意
而於爾喇嘛六度之行四無量之心亦符合矣爾
喇嘛其遣大喇嘛一人與朕行人會於喀爾喀境
內定期而遣之朕於此亦遣使臣赴所約之地與

爾使同往

九月乙亥厄魯特博碩克圖汗噶爾丹遣使率
三千人入貢噶爾丹遣使古爾班拜等攜夥伴
三千人入貢帶有印文理藩院奏請遣官驗其
符信以入毋得過二百人餘令遣回

上曰來人浮於定額着阿爾尼前往酌量議遣

十一月甲子厄魯特憨都台吉額爾德尼和碩
齊遣使入貢謝罪憨都台吉疏稱臣部運衰遭

噶爾丹執臣祖楚呼爾吳巴什滅臣父班第臣

時年十三有陪臣額爾德尼和碩齊者挈臣逃

出遵達賴喇嘛之諭在厄濟納託賴之地與

皇上邊民同居不謂其妄行劫掠致干天討臣常誠懲

之今已悔過伏望

聖主鑒宥額爾德尼和碩齊疏曰臣之兩諾顏乃噶爾

丹之叔及弟也無罪而噶爾丹執之殺之既蔑

我主何能與之共事故掠其邊境奔遁至此

皇上聖德光昭臣等本無爲非之心祇以惜死遂致草
竊今日夜思維無所逃於天壤謹悚惶陳奏於
聖明之前奏入得

旨巴圖爾額爾克濟農劫掠鄂爾多斯之事已經寬
免則懃都台吉屬下額爾德尼和碩齊亦應一體
宥赦所貢准其上納

十二月庚子阿齊圖格隆等以達賴喇嘛奏疏
復

命達賴喇嘛疏曰謹奏

皇帝陛下聚無量諸佛之典一藏兼收揚上乘文殊之
靈衆生並育勢如輪轉仁覃宇內其喀爾喀左
右翼議好之事曾遣扎爾布奈往盟始則右翼
不從繼則左翼不服是以未能協和但

皇上安集流離使之和好以衆生父母之心惻然鑒照
誠善事也今仰遵

聖旨復遣參巴陳布庫圖克圖令於十二月到喀爾喀

國定議謹遣拉木扎木巴羅卜臧諾爾卜拉通
阿旺拉克巴等賚奏以

聞

康熙二十四年正月甲子以阿齊圖格隆爲綽
爾濟復使達賴喇嘛達賴喇嘛遵奉

勅諭所遣諭和喀爾喀七旗之參巴陳布庫圖克圖
行至歸化城地方病歿

上復遣阿齊圖格隆等賚

勅告以故且以阿齊圖屢使西域有勞加以綽爾濟之號

賜達賴喇嘛

勅曰前因喀爾喀扎薩克圖汗奏陳土謝圖汗許還屬裔而不還許赴會盟而不赴朕恐兩翼不和必致有攻戰之患離散之憂特勅諭爾喇嘛共遣使往彼諭和爾喇嘛以禮法爲念以慈悲爲行即遣參巴陳布庫圖克圖前來朕心嘉之特遣大臣往

迎不意參巴陳布至歸化城之布爾哈素臺病歿
扎薩克圖土謝圖兩汗事究未得和協今將仍前
遣使爾喇嘛其重遣一人約定何地何時會喀爾
喀境內朕亦遣大臣依期赴所約之地以會

四月戊戌授厄魯特伊拉古克三庫圖克圖爲
歸化城掌印扎薩克大喇嘛

五月癸未

命議巴圖爾額爾克濟農羅卜臧滾卜阿拉卜灘等

歸併安插事時巴圖爾額爾克濟農屢疏請頒
勅印以約束部衆院議不允至是

上諭大學士覺羅勒德洪明珠曰鄂齊爾圖汗爲噶爾
丹所滅巴圖爾額爾克濟農等離其故地來至邊
境劫掠毛明安吳喇忒本應殄滅但若輩皆鄂齊
爾圖汗所屬朕俯念鄂齊爾圖汗世奉職貢恪恭
奔走兼之彼亦迫於饑渴是以宥其罪戾又羅卜
臧滾卜阿拉卜灘係鄂齊爾圖汗之孫與巴圖爾

濟農爲兄弟行應遣大臣往諭朕旨相度可居之地歸併安插封以名號給之金印璽書以示朕興滅繼絕至意其令議之

七月壬午厄魯特博碩克圖汗噶爾丹爲遣使事覆奏噶爾丹奏曰恭聞

皇上萬安不勝欣悅此地叨達賴喇嘛福庇幸得無恙蒙檄丹巴來文貿易之人入關定限人數若妄行果真

上諭誠是但自古以來四厄魯特貿易向有舊制我等
未便廢也若仍遵舊制則凡事皆宜矣得

旨下所司議理藩院議曰康熙二十二年會議已有
定例噶爾丹所奏舊制不便廢之語應毋庸議
疏入

報可

九月丁卯綽爾濟阿齊圖歸自達賴喇嘛達賴
喇嘛疏曰前爲喀爾喀扎薩克圖汗事

諭遣喇嘛爲使不敢有違即遣參巴陳布庫圖克圖
乃未至而道卒近者又復

諭以彼地生靈須得一賢能尊大之喇嘛前往庶乎
可濟此土白特之地無有尊於噶爾賈西勒圖
者是用遣之伏祈

霽顏俯鑒奏至

上諭尚書阿爾尼曰爾部可遣官二員乘驛至西海由
西寧酌取米麪茶葉并食羊百隻給噶爾賈西勒

圖爲稟餼併傳諭云此冬春之際若赴喀爾喀朕使亦自能到但喀爾喀各就水草游牧時氣不和誠恐會盟未能齊集喇嘛可徐行於來年四五月到彼朕使亦令於四五月間赴之節候既佳會盟亦易是用遣使存問喇嘛併餽爾稟餼

十月壬子理藩院尚書阿爾尼以訊問巴圖爾額爾克濟農情事還復

命先是議政王大臣等議言巴圖爾額爾克濟農但

奏請

勅印彼欲永居何地未經聲明應遣大臣曉諭巴圖爾額爾克濟農問明到日定議

上命阿爾尼前往至是阿爾尼奏曰臣至巴圖爾濟農所宣諭

聖旨巴圖爾額爾克濟農曰

皇上以我兄弟族屬離散欲使合處乃係非常殊恩何敢違

命近者達賴喇嘛亦謂羅卜臧滾卜阿拉卜灘所居
布壠吉里之地地隘草惡難以容衆不若與濟
農同居臣因問濟農欲居何地彼曰欲環居阿
喇克山之陰以遏寇盜以靖邊疆令部衆從此
地而北當喀爾喀畢馬拉吉里第諾顏之地由
噶爾拜瀚海額濟內河姑喇耐河鴉布賴山巴
顏努魯喀爾占布爾古忒空郭爾俄壠以內東
倚喀爾喀丹津喇嘛之部衆西極高河而居之

則咸沐

皇上恩澤而各得安生矣奏至議政王貝勒大臣議曰
頃奉

上諭遣使往訊達賴喇嘛俟訊明到日再議

上是之

十一月癸酉以安插巴圖爾額爾克濟農等事
遣使

諭達賴喇嘛先是理藩院以羅卜臧滾卜阿拉卜灘

及巴圖爾濟農歸併安插事開列應遣大臣職
名奏入

諭曰且勿遣其以此意諭知達賴喇嘛令一同遣使
至是

命扎薩克喇嘛垂木珠爾拉木扎木巴得木齊商南
多爾濟副都御史拉都虎等賁

勅前往

勅曰朕統馭寓內繼絕舉廢欲期咸底隆平厄魯特

噶爾丹博碩克圖汗滅鄂齊爾圖汗時羅卜臧滾
卜阿拉卜灘巴圖爾額爾克濟農等紛紜離散來
至邊境竄跡於金塔寺賀蘭山等處乃巴圖爾額
爾克濟農額爾德厄和碩齊等又以生計窘迫在
鄂爾多斯毛明安吳喇忒寧夏等處妄行劫掠朕
於此時不即發兵勦滅者乃軫念鄂齊爾圖汗歷
世職貢誠敬奔走是以寬宥其罪巴圖爾額爾克
濟農等亦戴朕恩願依朕爲生屢疏奏請勅印前

此朕曾諭厄魯特噶爾丹博碩克圖汗云巴圖爾額爾克濟農等如係爾所屬當即收之不能朕另有裁度乃彼約以丑年春爲期如逾期悉惟上裁今逾期已數月矣天下太平惟伊等兄弟骨肉分離散處失所朕心殊爲惻然爾喇嘛素以惻隱之心度此衆生凡厄魯特諸貝子皆供奉喇嘛信崇爾法朕思羅卜臧滾卜阿拉卜灘巴圖爾額爾克濟農皆鄂齊爾圖汗之苗裔也鄂齊爾圖汗於喇

嘛爲護法久矣何忍默視其子孫宗族至於困窮
今朕欲將伊等歸併一處安插於可居之地以示
興絕舉廢之至意爾喇嘛其遣使與朕行人定期
往會朕於此即遣大臣至所約之地偕爾使人前
往

臣謹按羅卜臧滾卜阿拉卜灘與巴圖爾額
爾克濟農皆厄魯特種族先後離散

皇上念其先鄂齊爾圖汗職貢恪共故加意撫納雖有

劫掠之罪亦貫而不治仍畀以名號

勅印俾擇善地安插興滅繼絕不啻澤及枯骨矣前
既以此諭噶爾丹茲復令達賴喇嘛為之
度地定居欲令耦俱無猜且使噶爾丹不得
借以爲辭更生嫌釁也

皇上於遠人不惟來之而又有以安之者如此

康熙二十五年正月乙亥厄魯特巴圖爾額爾
克濟農來

朝先是理藩院尚書阿爾尼奏言巴圖爾額爾克濟農攜其屬七百八十人將至請遣官往迎

諭曰巴圖爾額爾克濟農所屬亦限以二百人入關餘者留歸化城則現在噶爾丹之貢使可無辭矣茲當嚴冬之際行李牲畜盜賊可虞歸化城都統顧慕德現以年節來覲可令速回監視供應其回歸化城之人著遣戶部司官一員將宣府所貯米石給爲廩餼并遣爾院賢能官一員由光祿寺支

取銀兩採買羊隻給之此係外藩賓客不必限以銀數爾院所差之官竟行買給可也至是

賜宴畢照大台吉例頒賞仍以

上服貂裘賜之

壬午噶爾丹復奏額爾德尼和碩齊情事噶爾丹奏曰額爾德尼和碩齊事曾約於丑年四月回覆今已踰期其所行乖舛凡有是非一聽

聖裁

旨下議政王貝勒大臣等集議議曰安插巴圖爾額爾克濟農額爾德尼和碩齊等已遣使達賴喇嘛應俟復奏到日再議

上是之

四月乙酉朔遣大臣台吉等前往喀爾喀蒞盟理藩院奏稱達賴喇嘛所遣噶爾賈西勒圖約於今歲閏四月至喀爾喀墨爾根台吉處今爲期已近應遣大臣蒞盟奏入

命尚書阿爾尼台吉巴忒馬什畢力克圖喇嘛阿齊
圖綽爾濟前往又以喀爾喀七旗地方遼濶右翼
扎薩克圖汗處遣歸化城鄂木布丹津占素格
隆員外諾木齊岱去額爾德尼濟農盆楚克拉
卜灘處遣德木齊達爾漢格隆員外馬迪去色
稜阿海台吉處遣滾布格隆員外阿爾必特
祜去達爾馬西里諾顏處遣大喇嘛丹津格隆
員外巴牙思呼朗去遵義盆楚克台吉處遣德

木齊卓特拔達爾扎格隆員外沙哈里去額爾
克諾顏處遣薩木坦額木濟格隆員外費顏圖
去左翼土謝圖汗折卜尊丹巴庫圖克圖處遣
大喇嘛垂重格隆郎中喀拉去車臣汗處遣克
巴格隆員外達虎去信順額爾克帶青諾顏處
遣丹巴色爾濟格隆員外保住去墨爾根諾顏
處遣額木齊格隆郎中安布祿去

賜喀爾喀七旗汗濟農諾顏台吉等

勅曰朕統御寰宇中外一體務使交相輯睦共享昇平乃爾右翼扎薩克等內自相亂兄弟人民多歸左翼其左翼扎薩克兄弟人民亦有歸入右翼者爾等以兄弟之親互相吞併異日必至交惡生亂朕心惻焉康熙二十三年曾頒勅於達賴喇嘛議共遣使諭和爾等而達賴喇嘛亦謂朕俯念道法慈憫衆生有如父母意甚善也特遣噶爾賈西勒圖前來朕亦命尚書阿爾尼台吉巴忒馬什畢力

克圖喇嘛阿齊圖綽爾濟等與之偕往爾汗濟農
諾顏台吉等當仰體朕憫爾累世恭順職貢修好
之至意及達賴喇嘛廣運六度虔修四無量之慈
心盡釋舊怨將兄弟人民各歸本扎薩克令其和
協照舊安居不但仰副朕命與達賴喇嘛之意即
爾七旗永無離散之苦爭鬪之害福祿所綏亦且
無疆矣

時喀爾喀右翼扎薩克圖汗歿其子噶爾旦台

吉請襲父職

上允之并

命阿爾尼因便致賻

六月乙卯折卜尊丹巴庫圖克圖遵

諭覆奏先是大喇嘛垂重格隆起行

上命傳諭折卜尊丹巴令亦至盟壇共議至是折卜尊

丹巴奏曰臣自幼皈依達賴喇嘛之教叨折卜尊

丹巴之名普度爲心闡揚佛法息列辟之爭救

生民之苦扎薩克圖汗之子孫屬裔前已陸續
給還餘者正在察核今蒙

聖慈念喀爾喀七旗不睦遣使於達賴喇嘛而達賴喇
嘛亦遣噶爾賈西勒圖爲使赴盟

諭臣亦至盟壇共議其事臣當遵

旨同赴盟所竭誠公議以仰副

聖懷疏入

上命移文尚書阿爾尼噶爾賈西勒圖等知之

七月癸巳

命侍郎拉都虎等往會達賴喇嘛使人於阿喇克山
達賴喇嘛疏曰

皇上俯鑒鄂齊爾圖汗職貢有年不忍其後人骨肉分
散靡所止居惻然垂照欲巴圖爾額爾克濟農
羅卜臧滾卜阿拉卜灘集居一處特降

恩綸甚盛德也第此西海之地各有分屬若使居
天朝境內又恐厄魯特或有異言其阿喇克山之旁

亦屬狹隘乞

大君矜憐擇水草寬濶之處安插一隅茲已遣車齊克
他賴堪布羅卜臧令於十月內至阿喇克山伏
請遣使往會

上命遣拉都虎溫達去且

諭之曰爾等可與達賴喇嘛使者同往召集巴圖爾
額爾克濟農羅卜臧滾卜阿拉卜灘等相度伊等
可以游牧之地指而與之仍會同提督孫思克將

地之界限令伊標下官弁認記之巴圖爾額爾克
濟農等如因給地安插欲來謝恩則許之來達賴
喇嘛使人如欲來請安亦許之來否則給以廩餼
而遣之其額爾德尼和碩齊等如欲與巴圖爾濟
農等一同游牧亦許之爾等可與巴圖爾額爾克
濟農羅卜臧滾卜阿拉卜灘等定沿邊爲盜作亂
之罰著爲令前巴圖爾額爾克濟農來覲之時已
自誓不復令屬下爲非其羅卜臧滾卜阿拉卜灘

亦須嚴禁所屬兄弟既已完聚從此和睦安居倘再致流亡他往殊負朕歸併眷恤之意矣朕所以不憚諄切訓諭者亦以其先世恭順有年不欲令其子孫失所也其一傳諭之

九月壬辰

命副都統綽爾濟雅克運送尚書阿爾尼糗糧時阿爾尼差筆帖式英古奏報會盟日期且言軍中所有糗糧僅可食至十月中旬旬恐致匱乏

上命於歸化城動支二百餘人一月之糧令喀爾喀和碩達爾漢親王諾內等六旗選取駱駝解送地方遙遠仍遣歸化城副都統綽爾濟雅克率佐領驍騎人等一同解往

十月戊午尚書阿爾尼喇嘛噶爾賈西勒圖等各奏報喀爾喀七旗遵

諭誓和阿爾尼疏曰臣等於八月十六日召集喀爾喀兩翼汗及濟農諾顏台吉等宣示

聖諭^臣等復於二十二日召集伊等曉諭之曰我等來

時曾降

訓旨諭爾等曰爾汗及濟農諾顏台吉等以侵占屬
裔之故兄弟不睦爾等本係同祖子孫若交惡構
怨將來必致罹於塗炭朕不忍坐視故特頒勅旨
爾等即宜和睦和睦於朕無所利不睦亦於朕無
不利也惟念爾等累世恭順職貢朕矜恤之心無
分中外是以開誠曉諭令爾等同歸於好宣

諭畢色稜阿海台吉等跪言曰我七旗喀爾喀俱係
一祖之子孫向皆和好自羅卜臧肇亂以來互
將人民隱占是以蓄怒交惡今

皇上與達賴喇嘛特遣大臣喇嘛等使我等和睦安樂
我等小人不勝懼忭然欽遵

聖旨和好息爭與否在吾兩汗耳土謝圖汗之弟西地
西里巴圖魯台吉跪言曰

聖上諭旨勸我等甚當我兩汗相惡俱係小人獻讒所

致今使兩汗納忠言斥讒佞我等竭力諫諍自
當言歸於好兩翼汗曰

皇上令我等和睦

聖意諄復所以開示愚昧者甚至我等敢不祇遵

臣等

遂令扎薩克圖汗土謝圖汗行相問抱見禮又

令左右二翼衆台吉亦行相問抱見禮於本月

二十三日令汗及濟農大諾顏台吉等檢選所

屬六十餘材能寨桑俱於噶爾賈西勒圖折卜

尊丹巴前懸掛佛像設立重誓兩翼互相侵占
之台吉人民令各歸本主一切應結事件俱審
擬完結仍令濟農諾顏台吉等跪於佛像之前
設立重誓曰自今以往當永遠和協此皆

皇上非常威德之所致也謹以狀

聞噶爾賈西勒圖亦以諭和事竣具疏陳奏得

旨喀爾喀左右兩翼汗及濟農諾顏台吉等俱遵朕
諭旨即行設誓和睦可嘉所司其知之

臣等謹按凡立國者必先有內釁而後外侮
始生喀爾喀與厄魯特境壤相接強隣洊食
已駸駸乎有不支之勢乃迷而不悟兄弟鬩
牆日尋干戈內自讐敵其根本先撥而望枝
葉之無害難矣故以七旗之衆一朝破敗而
不可救

皇上於其未敗之前先幾洞燭宣示

詔書勸諭婉切欲使敦在原急難之義以并力捍禦

母或骨肉相殘致爲他人所吞噬也

聖謨洋洋嘉言孔彰意豈不深遠哉

十一月癸巳侍郎拉都虎等以安插事畢復

命拉都虎溫達商南多爾濟等疏曰臣等出寧夏阿

喇克山閱視地形得遇巴圖爾額爾克濟農約

其在東大山北候聽宣

旨於九月十二日在嘉峪關外得遇達賴喇嘛使者

車齊克他賴堪布隨遣人召羅卜臧滾卜阿拉

卜灘至語之故亦約會於東大山北羅卜臧滾
卜阿拉卜灘曰蒙

皇上洪恩賜我等地方當即偕諸大人往赴約會之地
但我姊阿奴乃噶爾丹之妻聞率兵千人聲言
往謁達賴喇嘛從此而過或中懷詭計襲我亦
未可定不得不整力待之請即於此地宣

旨可乎臣等隨同車齊克他賴堪布宣

旨訖羅卜臧滾卜阿拉卜灘回奏曰

聖上俯念臣祖鄂齊爾圖汗使臣兄弟完聚給以土地

臣不勝欣忭即當遷至濟農所居一同遊牧但

正值冬月屬下人民散處使之遷移貧人牲畜

少者難以度冬請俟來年草青時遷之本月二

十三日臣等至東大山北令巴圖爾額爾克濟

農跪宣

旨畢巴圖爾額爾克濟農奏云臣等係亡國流裔蒙

皇上矜憐給以牧地俾令得所

高厚之恩愧弗克當當即叩頭謝

思臣等又謂巴圖爾額爾克濟農曰爾所請喀爾占

布爾古忒空郭爾俄壠巴顏努魯鴉布賴噶爾
拜瀚海等地方給汝遊牧外自寧夏所屬玉泉
營以西羅薩喀喇山嘴後至賀蘭山陰一帶布
爾哈蘇台之口又自西寧所屬倭波嶺塞口以
北奴渾努魯山後甘州所屬鎮番塞口以北沿
陶關泰薩喇春濟雷渾希里等地西向至厄濟

納河俱以離邊六十里爲界隨與巴圖爾濟農
屬下達爾漢噶卜楚喇嘛波克寨桑及提督孫
思克標下遊擊李本善等畫地爲界而記之臣
等又與巴圖爾額爾克濟農定議罰例蒙古如
殺邊內之民不論幾人俱斬其妻子牲畜入官
偷盜民人牲畜者爲首二人絞仍將妻子牲畜
入官餘者罰以三九牲畜仍鞭一百其不爲盜
而私入邊遊牧者台吉則罰以三九牲畜寨桑

等罰以一九牲畜平人則鞭五十外仍將所騎馬匹盡行入官其攜帶家口牲畜入邊遊牧者不論幾戶俱入官至民人往邊外伐木刈草蒙古有奪其食物者不論幾人將所乘馬匹盡行給還民人仍鞭三十其屬下每犯一次并罰濟農五九牲畜俟羅卜臧滾卜阿拉卜灘來會之時將此項情節亦明告於彼其額爾德尼和碩齊亦須嚴禁勿使妄行盜竊又厄魯特諾顏庫

圖克圖之子噶爾亶多爾濟者亦係鄂齊爾圖
汗之嫡孫應令與巴圖爾額爾克濟農等附牧
奏入

上曰噶爾亶多爾濟既係鄂齊爾圖汗之孫應令其與
巴圖爾額爾克濟農等一同游牧其拉都虎等所
定地界并嚴禁盜竊之例理藩院其移文督撫提
鎮通行曉諭

聖祖仁皇帝親征平定朔漠方略卷三

欽定四庫全書

聖祖仁皇帝親征平定朔漠方略卷四

康熙二十六年正月丙申喀爾喀兩翼汗及七旗濟農諾顏台吉等合疏請上

尊號土謝圖汗等疏曰喀爾喀兩汗率領七旗貝勒等謹奏

至聖皇帝睿覽蒙

皇上鑒照時事欲安輯遠方往

諭達賴喇嘛遣使并差大臣會同七旗大喇嘛折卜

尊丹巴庫圖克圖召集汗濟農諾顏台吉等宣

讀

訓旨我等欽遵

聖諭不敢有違普濟衆生得大安樂道既蕩平法亦恢

布

聖主鴻恩無計酬報口不能悉敢竭悃忱請上

尊號伏祈

仁慈憐而受之疏入

諭曰喀爾喀諸汗貝勒等戴朕向來仁恩恪恭敬順
請上尊號具悉悃忱但衆汗貝勒等宜仰體朕一
視同仁無分中外至意謹識朕諭和之旨自茲以
後無相侵擾親睦雍和永享安樂更勝於上朕尊
號也况前者內外諸王貝勒大臣等請上尊號未
經允行此所奏請亦不准行著理藩院將此情由
行文曉諭之

乙巳土謝圖汗奏請

勅印土謝圖汗奏言我喀爾喀國從來聘享貢獻服
教承

恩得以安居樂業間有微愆亦蒙

聖訓悉與湔洗國中向無佛教是以愚迷自我曾祖往
謁達賴喇嘛得蒙優禮加以瓦察喇賽音汗之
號於是我地佛法炳如日星延及我身往謁達
賴喇嘛蒙其俯恤授以道法宏訓錫以名號印

劄又蒙

皇帝寵眷厚加恩賚俾得暢遂茲特懇者敢祈與遐荒
萬國君長中分別優異之

錫以金章寶券俾世世子孫恪恭固守奏至

上曰喀爾喀兩翼授受屬裔之事未結未便遽與印章
可將原疏發還口傳旨諭之

二月丙子

命以車臣汗長子伊爾登阿拉卜灘襲汗號時車臣

汗歿其長子伊爾登阿拉卜灘遣使奏

聞

上曰喀爾喀七旗誓和未久車臣汗之位不便久懸其
勅諭土謝圖汗折卜尊丹巴庫圖克圖扎薩克圖
汗等將車臣汗長子伊爾登阿拉卜灘速襲為汗
仍遣勅曉諭達賴喇嘛知之

賜土謝圖汗等勅曰朕惟自古帝王統御寰區遐邇
一體其歷年久遠職貢恭順竭盡誠心者益加眷

賴瑪爾等累世悃誠遣使入貢恭順有年正在嘉
賞忽聞車臣汗身故朕殊震悼特遣大臣遺之賻
贈近念爾喀爾喀內自交惡朕特遣大臣諭令和
睦未久車臣汗之位不可久虛爾喀爾喀例以長
子承襲伊爾登阿拉卜灘台吉既係長子且聞其
人亦可著嗣立為汗爾等其遵諭速行
賜達賴喇嘛勅亦如之

四月甲寅噶爾丹遣使入奏噶爾丹疏曰巴圖

爾額爾克濟農羅卜臧滾布額爾德尼和碩齊
之事前遣內大臣已向我等言之矣今聞又以
伊等之事聞之達賴喇嘛信有之乎四厄魯特
與漢人貿易之事如仍復舊例則事皆歸好矣
又一書遺尚書阿爾尼等曰喀爾喀七旗之事
達賴喇嘛雖曾遣扎爾布忒往盟七旗不能從
其言今

聖主欲使大衆安樂遣使於達賴喇嘛達賴喇嘛遣西

勒圖與

天使偕往會盟七旗是役也折卜尊丹巴與西勒圖
相見之禮殊屬未當此係得之傳聞者如果真
則萬無是理也前內大臣來時據云

聖主之意以為法門者黃帽法門喇嘛者達賴喇嘛也
諸使臣當視有裨於黃帽法門者而行之我等
乃黃帽之施主故以所聞之言致書於諸大臣
大約道法以何者為善其明白致覆奏下所司

議理藩院議以貿易之事已有定例喀爾喀七旗會盟其事已畢所奏應無庸議

上是之

五月辛卯

命以伊拉古克三庫圖克圖為總管京城喇嘛班第
扎薩克大喇嘛

丁酉折卜尊丹巴庫圖克圖奏報噶爾丹貽書
詰責情事折卜尊丹巴奏言噶爾丹遺書於我

內云枯冷白爾齊爾之盟爾與西勒圖抗禮踞
坐大為非理達賴喇嘛道法徧及十方西勒圖
者係宗喀巴座上之喇嘛特遣以主盟議事者
也若竟行鈞敵之禮於理順乎奏至下所司議
理藩院議以去年盟會西勒圖與折卜尊丹巴
議定而後相見已往之事應無庸議

上是之

六月甲戌土謝圖汗奏報扎薩克圖汗與噶爾

丹會盟情事土謝圖汗奏言噶爾丹以枯冷白爾齊爾之盟折卜尊丹巴與西勒圖敵禮相見甚屬非理貽書詰責近聞噶爾丹遣伊屬車臣吳巴什者令右翼會盟即盟所讀其誓書畧曰汝右翼人等毋得違扎薩克圖汗號令違者即為叛教以羅卜臧賽音台吉為例又聞噶爾丹移營前來由阿爾台山陽進三黑格爾之地扎薩克圖汗亦移營前往會之又噶爾丹不許得

克得黑墨爾根阿海來歸左翼令其移營前往
且令右翼諸諾顏等隨扎薩克圖汗環繞安營
噶爾丹前書之詞既甚兇狠今偵得復欲加兵
於我倘或不備則坐受攻伐如欲備之恐蹈先
舉之愆謹以此情事奏明奏至

上曰扎薩克圖汗受朕恩最深此言或係下人虛傳疑
間其檄知土謝圖汗當以日前誓和為重永歸於
好

九月庚子

勅諭厄魯特喀爾喀罷兵時土謝圖汗帶青諾顏墨爾根台吉遣使奏言噶爾丹書至我等曾遣使致覆彼言我乃黃帽大施主心不釋然終必在此伺察等語我喀爾喀之在彼國者及厄魯特向與我等通好者俱言噶爾丹分南北兩路來伐是實我喀爾喀右翼人等除扎薩克圖汗及得克得黑帶青台吉之外餘者俱言興兵是實我

界上人等驚惶屢促我等赴彼是以率兵起行
伏乞

聖鑒去年盟誓時扎薩克圖汗之情形非特尚書見之
他人亦盡知之彼現今與厄魯特杜噶爾阿拉
卜灘台吉一處遊牧詳視噶爾丹之狀大有爭
執禮體是非之意為此馳奏奏至

旨下議政王貝勒大臣集議安親王素諳蒙古事宜
亦令集議議曰厄魯特喀爾喀俱係

本朝職貢之國應遣

勅令其罷兵同歸於好仍

勅達賴喇嘛令其遣使諭令罷兵其土謝圖汗

勅書即發來使布延圖綽克圖寨桑等賫去噶爾丹

勅書即交來使陶賴哈什哈等乘驛賫去達賴喇嘛

處

勅書發與喇嘛商南多爾濟郎中布顏圖賫去

上從之

賜噶爾丹勅曰據喀爾喀土謝圖汗奏稱厄魯特內
向遊牧兩路來攻我界上人等屢請赴彼故出兵
迎之等語朕統御宇內無分中外爾厄魯特喀爾
喀兩部落若果互相殘害朕心大不忍焉曾於康
熙十六年檄諭爾等務期共相和好爾覆奏云厄
魯特蒙古之道仗達賴喇嘛福庇得以鞏固聖諭
誠是等語爾噶爾丹博碩克圖汗累世恭順職貢
有年如果舉此大事無不奏聞於朕者因路遠地

遙真偽難明朕尚未之深信或不逞之徒兩地構煽亦未可定爾兩部如果興兵必有一方至於敗亡不但重負朕向來一視同仁之至意羣黎之死生離散朕心深為憫惻勅書到日即為息爭修好則爾恭順之心朕實嘉之亦已勅諭土謝圖汗令其罷兵矣為此特令爾使陶賴哈什哈等賫勅往諭

賜土謝圖汗達賴喇嘛勅畧同

十月己巳巴圖爾額爾克濟農自請往援土謝圖汗巴圖爾額爾克濟農移文於理藩院曰伏思前讐急欲往援土謝圖汗但身屬

朝廷不敢專擅乞轉奏

聖明俯鑒允許所慮貧苦屬裔欲多往則途路遙遠艱於馬匹少往則救援勢寡又乏器械至欲奏報所聞緊急大事若由舊路而往則遠若自鄂爾多斯而往未冰之時又難以渡河自寧夏前往

路雖近而不許擅行此等情由祈即示知理藩院以

聞

命滿洲大學士及兵部理藩院集議議曰頃者土謝

圖汗奏

聞發兵

皇上軫念喀爾喀厄魯特累世恪共職貢特頒

聖諭令其和好又

勅達賴喇嘛遣使諭兩部落息兵罷戰則巴圖爾額
爾克濟農所請之事應無庸議至巴圖爾額爾
克濟農倘欲奏聞緊急重情遇冰凍時經鄂爾
多斯著貝勒宋拉卜派人引路送至京城若冰
消時從寧夏入口寧夏總兵官派人引路送出
橫城口至鄂爾多斯貝勒宋拉卜仍派人引路
送至京城其遣奏緊急重情不許過三四人若
常貢遣使仍照前行議入

上從之

康熙二十七年三月丙子

命尚書阿爾尼以遣使俄羅斯集議事曉諭喀爾喀
時俄羅斯察罕汗遣使費岳多羅等至色稜格
地方來期我使至彼集議定界

上命內大臣索額圖都統公國舅佟國綱及尚書阿爾
尼左都御史馬齊護軍統領馬拉等往主其議并
率八旗前鋒兵二百護軍四百火器營兵二百偕

往理藩院侍郎溫達自殺虎口起設站至喀倫歸
化城副都統阿玉璽自歸化城撥車載米一千石
運至喀爾喀地方接濟大軍又我軍經過喀爾喀
或致震驚阿爾尼其往諭折卜尊丹巴庫圖克圖
令其曉諭喀爾喀等照常安居貿易

四月甲寅

遣內閣學士拜里往諭噶爾丹時喇嘛商南多爾濟
郎中布顏圖等攜達賴喇嘛疏至其畧云

皇上撫視人民中外一體聞厄魯特喀爾喀兩國相殘

即遣人賫

勅諭和今遵

聖諭又遣卜克岡喇嘛去矣仍祈

皇上睿鑒或頒

勅諭或再遣人示以去殘之道理藩院以

聞

上遣內閣學士拜里喇嘛阿齊圖綽爾濟往諭噶爾丹

六月癸丑折卜尊丹巴庫圖克圖遣使告急折
卜尊丹巴遣使告曰去年聞噶爾丹率兵三萬
餘分道而來誘我扎薩克圖汗及得克得黑墨
爾根阿海達爾馬西里諾顏等叛去我土謝圖
汗以為前年七旗業已誓和今若輩叛者何也
乃領兵將此三人拘回又聞噶爾丹之弟多爾
濟扎卜滾占滾卜等領兵來掠右翼班第帶青
台吉巴爾丹台吉卜圖克森庫圖克圖等之人

畜而去土謝圖汗因追殺多爾濟扎卜其所掠
卜圖克森庫圖克圖巴爾丹台吉等五人不知
所在其餘台吉及屬裔盡行收回又聞噶爾丹
領兵三路而來土謝圖汗與西海羅卜臧滾布
領兵至噶爾丹所駐喀喇厄爾其克察汗厄爾
其克之地遇達賴喇嘛使者所遣人言

皇上及達賴喇嘛使汝與厄魯特和好宜各領兵而退
土謝圖汗不敢違已率兵退駐楚克獨斯諾爾

地方以候盟會今噶爾丹自杭愛山後掠取右
翼衛徵哈灘巴圖爾車臣諾顏伊爾登台吉左
翼昆都倫博碩克圖等至忒木爾地方土謝圖
汗之子噶爾旦台吉與戰陣亡幾及百人噶爾
旦台吉及厄爾奇木帶青等八人僅免又聞丹
津溫卜丹濟喇杜噶爾阿拉卜灘等率兵來取
厄爾德尼沼之地其地距我所駐祇二日程情
事緊急不及繕疏一面奏聞

聖上一面發兵前往念我喀爾喀向蒙
聖主大恩安居樂業今事在危急仰祈

睿鑒速為救濟理藩院以

聞

上勅諭折卜尊丹巴庫圖克圖曰爾喀爾喀與厄魯特
向在本朝往來進貢聞爾等內自交惡故遣人諭
和今汝等果不得已來歸當收而養之因汝誠心
奏請故特賜汝信帕一幅並恩賞來使又

諭檄知設站侍郎溫達傳示各汛設防哨探

庚申尚書阿爾尼奏報厄魯特敗喀爾喀兵阿

爾尼奏言

臣

至喀爾喀境已將我軍赴俄羅斯

議界取道之故諭知沿途居住墨爾根諾顏及

車臣汗旗分台吉令其照常安居貿易勿得驚

擾未至折卜尊丹巴所距七八日程聞噶爾丹

兵已至厄爾德尼泊

臣

不之信一面遣臣偕來

內閣侍讀海三代乘驛赴折卜尊丹巴所詳察

情形

臣

亦一面探聽聞噶爾丹兵擊敗衛徵哈

灘巴圖爾昆都倫博碩克圖又收服達爾馬西
里諾顏台吉兵衆向厄爾德尼沼而來土謝圖
汗噶爾旦台吉逆擊之為所敗不能與其妻子
會僅收集所屬二三百人駐於齊其爾台之地
噶爾丹兵盡掠厄爾德尼沼居民直抵喀喇卓
爾渾之地距折卜尊丹巴所居僅一日程折卜
尊丹巴攜土謝圖汗妻與子媳及喇嘛班第等

共三百餘人夜遁喀爾喀通國各棄其廬帳器
物馬駝牛羊等紛紛南竄晝夜不絕土謝圖汗
不知存亡或言此厄魯特軍中噶爾丹在焉兵
萬許分數路而來又言噶爾丹未嘗親來乃杜
噶爾阿拉卜灘等率六七千兵由杭愛山陰而
來其殺掠喀爾喀收降台吉焚燒寺廟毀壞經
典佛像俱實臣因據形勢之地以待之俟海三
代歸日另有情形再奏外謹此具狀以

聞奏至

上諭曰喀爾喀厄魯特交戰當防守我邊界其令兩翁
牛特兩巴林克西克騰四子部落阿祿科爾沁喀
喇沁等八旗共派兵二千五百每旗擇幹練善於
約束之台吉各一員或都統或副都統各一員叅
領各二員佐領各四員於蘇尼特喀倫一帶暫駐
防守

七月壬申

命議安置入邊喀爾喀事先是車臣汗伊爾登阿上灘病歿

上遣侍衛阿南達員外郎克什忒致賻至是阿南達坐從車臣汗處歸奏曰臣等於五月二十五日以車臣汗所探知噶爾丹之弟多爾濟扎卜領之四百前來哨探土謝圖汗子噶爾旦台吉擊之是以噶爾丹領兵前來敗額爾濟根衛徵哈巴圖爾之軍焚厄爾德尼沼取土謝圖汗之口

土謝圖汗奔赴翁音折卜尊丹巴攜其妻孥以
至車臣汗旗下額古穆爾地方本欲募兵往
因車臣汗部衆亦各奔竄恐為厄魯特追及
克魯倫河而南向我蘇尼特喀倫而來詳視
爾喀舉國震驚見一影響隨以為敵至無一
敢北向相拒者臣於六月十九日至蘇濟地
見折卜尊丹巴營中紛紜擾亂驅逐馬駝又
臣汗屬下四阿霸哈納爾等部人衆俱各奔

但 可 孤 兵 救 灘 石

我喀倫似此驚擾我喀倫左側之人未必不為
震動又侍郎溫達報曰喀爾喀人衆屯聚於蘇
尼特兩喀倫地方內有台吉數人率其屬裔負
裝闌入守邊將弁驅之不出彼言我地被兵不
得已而始進邊汛

皇上聞之亦必憐憫逐之不去又折卜尊丹巴亦率衆
來至近邊駐劄距設站之地僅半日程理藩院
以

八 平 万 八 喀 舌 拔 迦

聞

上諭內大臣國舅佟國維都統蘇爾達侍郎額爾黑圖
侍衛阿南達等曰現今窘迫來奔之喀爾喀等應
否令其出我邊汛將彼汛哨稍展對伊等所居之
地另為設哨防守此事關係重大其令議政王貝
勒大臣詳議議曰喀爾喀人等窘迫來奔不便即
令出邊若久留之又恐牧地殘毀姑俟一月以
內探得實音將來奔之喀爾喀作何措置再行

確議

上從之

甲戌

遣侍衛阿南達等賫

勅諭噶爾丹時侍讀海三代往折卜尊丹巴處途遇

厄魯特因攜噶爾丹疏歸內言折卜尊丹巴土

謝圖汗達達賴喇嘛之教不尊禮西勒圖我告

之以禮法歸好為是而彼反以為非竟興兵而

來我於此仗達賴喇嘛之靈來毀其居彼兩人者不為衆所許殆無所往即往亦不納也且微有所聞及他言具在侍讀海三代口中海三代口奏噶爾丹之言曰倘折卜尊丹巴往投

皇上或拒而不納或擒之畀我乞以此為我代奏隨下議政王貝勒大臣等集議議曰

皇帝俯視天下萬國為一體其職貢之國凡有困迫來投者無不受而養之折卜尊丹巴以敗奔入我

喀倫並未來投豈有擒而畀之之理此等情節
應擬

勅遣使往諭議入

上是之遣一等侍衛阿南達喇嘛高南多爾濟戶部郎
中西拉工部員外郎穆朱呼賚

勅往諭

勅曰朕統御宇內胞與為懷願率土共享太平無戰
爭離散之苦彼此協和各得其所前聞爾厄魯特

與喀爾喀交惡興兵朕思爾等向皆和好恐致滅
亡以達賴喇嘛愛育衆生令同遣使諭和達賴喇
嘛欣然遣齊緝克他賴堪布朕亦遣阿齊圖綽爾
濟學士拜里前往諭和又前此遣爾貢使陶賴哈
什哈等賫勅馳驛前去未知到否亦曾以此勅諭
喀爾喀土謝圖汗矣今海三代歸奏始知汝至喀
爾喀之地海三代非朕所遣乃奉差於俄羅斯議
好定界尚書阿爾尼所遣故海三代歸奏不甚明

悉且不曾與爾面見爾厄魯特喀爾喀俱遵行達
賴喇嘛道法達賴喇嘛向來利濟衆生欲使同歸
和睦不致敗亡是以皆特遣使人往諭道路遙遠
汝等交惡之故所聞未明茲特遣使賫勅詰問情
由其仍遵朕旨與達賴喇嘛之教議和或別有行
止明白具本交此使來奏

命安親王岳樂簡親王雅布駐防蘇尼特喀倫時噶
爾丹肆掠喀爾喀逼近喀倫

上命安親王簡親王各率包衣兵五百名赴蘇尼特喀
倫駐防

丁丑

命大臣官員等調蒙古兵偵探設哨時巴林王納木
達克台吉阿拉卜灘等報稱喀爾喀兵敗於厄
魯特土謝圖汗折卜尊丹巴遁走其屬下台吉
等入內奔竄來投者甚多

上命內大臣津進郎中帕海等速赴烏朱穆秦巴林駐

喀倫地方偵探情形侍讀學士馬拉赴科爾沁等
亦駐喀倫偵探侍衛關保赴喀倫大臣駐劄之處
傳諭侍郎溫達令其往會阿霸哈納爾班第帶青
車陵帶青公同派發兩帶青之兵於折卜尊丹巴
所居之地設哨防護其諭噶爾丹勅及海三代攜
來噶爾丹奏疏俱令與折卜尊丹巴視之巴林王
所奏令與我喀倫駐劄大臣視之伊等意中以為
應何如行事着即議奏尚書阿爾尼遣人諭喀爾

喀墨爾根諾顏令其凡事探實來奏尋津進奏言
臣等於初八日自京起程十三日到蒿齊忒旗
下吳納黑特地方見巴林阿祿科爾沁之兵尚
未過此地隨遣人促彼速行兩旗兵到之後臣
即往會巴林多羅郡王納木達克阿祿科爾沁
固山額駙巴忒馬什等告以前來之故一同奮
力疾行十八日至烏朱穆秦中察汗鄂波之綽
諾果兒河相視形勢之地率二旗兵為兩營臣

又遣人約蒿齊忒達爾馬吉里第王及烏朱穆
秦和碩車臣親王蘇達尼曰喀爾喀所入地方
與汝等旗分相近汝等各宜發兵五百親率之
至哨汎綽諾果兒地方覓我與之期日而遣之
甲申

命尚書吉爾他布等率科爾沁及

盛京兵備噶爾丹喀爾喀洪俄爾帶青台吉奏言
聞噶爾丹來掠達賴台吉我等震驚挈裝而行

進吳兒會河度噶爾丹已至枯倫貝爾地方為
此遣西拉卜格楚爾馳報

上諭和碩裕親王福全等曰厄魯特已至枯倫貝爾地
方去我喀倫僅七八日程宜預為備禦令科爾沁
土謝圖親王沙津達爾漢親王班第派所屬十旗
兵一萬量委才能都統副都統叅領等管領令盛
京將軍副都統等派彼處兵一千自協領以下章
京選賢能者派出俱費兩月糧至喀爾喀河備禦

所派盛京兵令副都統穆泰率往科爾沁地方於所指之地備禦尚書吉爾他布都統巴海護軍統領童保等自京城往科爾沁地方前去土謝圖親王沙津達爾漢親王班第扎薩克圖郡王鄂齊禮公安達西禮台吉巴忒馬什務令必去其餘王以下台吉以上量留數人於家餘著盡去叅領品級章京巴扎爾侍讀學士馬拉速會同科爾沁王等點派出征官兵

壬辰侍衛關保攜侍郎溫達疏至覆

命溫達疏曰七月十六日侍衛關保到喀倫臣即

欽遵

諭旨往折卜尊丹巴所召集阿霸哈納爾班第帶青
及車陵帶青等至即當折卜尊丹巴前宣傳

上諭帶青等答言

聖上俯念折卜尊丹巴降斯

天語即當欽遵

諭旨派兵一千五百以二百防守折卜尊丹巴以一
千三百往戍瀚海前後又車卜登額爾克台吉
索諾楚揚寨桑願以二十人前往躡踪設哨臣
因諭令晝則登高瞭望夜勿舉火如不見影響
則躡探其踪精細行事諭噶爾丹

勅書及其奏疏示折卜尊丹巴折卜尊丹巴奏言
聖上向來恤我感刻五內我亦仗

天朝以自存今又蒙如此洪恩何能酬報惟有旦夕

頌祝而已次日臣即公同帶青等監閱派發分遣訖關保攜歸奏

聞

丙申

命撤回內大臣索額圖等兵先是以喀爾喀厄魯特構兵前所遣大臣官員與俄羅斯使人定議立界事不便前往遣侍衛夸色關保馳驛追索額圖等率兵回駐喀倫至是以尚書阿爾尼奉調

至

行在

上諭之曰索額圖等所帶往官兵駐彼無用著撤回索額圖佟國綱馬喇仍著留駐

內大臣津進奏報噶爾丹招誘車臣汗屬衆情形津進奏言有達顏寨桑者車臣汗所屬也其子阿拉卜灘於二十二日來至喀倫告曰我等原居克魯倫之南六月初八日厄魯特前軍數

百人猝至我等接戰子女牲畜多被俘掠後見
噶爾丹親率兵一支過河下流而去遣人來召
我父至彼軍中且給以印文誓不戕害我父不
得已挺身前往追至第四日地名對諾克及之
召入謂之曰土謝圖汗折卜尊丹巴吾讐也故
追彼至此與汝等無涉懼汝等故給汝印文
令汝安居且我已遣奏

皇上此二人來投拒而勿納否則執以畀我汝等及其

餘喀爾喀皆應屬於我矣汝等其降我能降則
來秋遣使否則不必因給以人畜而歸我父令
我報聞并以印文繳送臣等閱視之其詞曰噶
爾丹秉教博碩克圖汗檄授車臣汗大小衆台
吉前者我兩家通使不絕緣折卜尊丹巴土謝
圖汗事興兵來追此兩人以致身涉汝地今思
圖後好特召達顏寨桑來告之以意并發此檄
汝等若以吾言為是當照此檄而行津進遣郎

中賽住等奏

聞

八月乙巳土謝圖汗請兵助討噶爾丹土謝圖
汗奏言臣自昔誠心職貢以為或遇勍敵至於
危急希得救援今噶爾丹興兵攻我事勢危急
我兵雖少且與噶爾丹一戰決之恐不能禦伏
乞

天朝發兵救援奏入

命議政王貝勒大臣等集議議曰厄魯特喀爾喀向
皆恭順職貢有年今厄魯特謂喀爾喀為曲喀
爾喀亦謂厄魯特為非土謝圖汗雖為厄魯特
所欺請救

本朝似不便遣兵相助向使土謝圖汗早如四十九
旗歸於

本朝噶爾丹必不敢侵犯即使侵犯

本朝必不忍坐視況噶爾丹前破鄂齊爾圖汗獻所俘獲

聖上猶以彼自相屠害不忍受之則從來未嘗異視彰
彰明矣設土謝圖汗率衆來歸或仍存其汗號
為之安插出自

聖主恩綸俟

命下之日該部明白檄行可也

上從之

臣謹按喀爾喀與厄魯特向皆效順之國往
來通貢久歷年所其興戎起釁亦互有曲直

我

皇上一視同仁初無厚薄故於厄魯特之獻俘也既却而未受於喀爾喀之乞師也亦拒而不許即其構怨已深日相屠翦猶加勸諭令歸和好存此心以撫馭遠邇誠所謂至仁如天者與若後此一怒安民則又仁者之無敵矣

己酉

命撤科爾沁兵侍衛阿南達等移咨理藩院曰職等

於七月二十七日行至克魯倫河迤北喀喇烏
素之地探知噶爾丹因達賴喇嘛使人至由克
魯倫河託爾會之地退回疾行又聞噶爾丹向
達賴喇嘛使人言我若與土謝圖汗和則吾弟
多爾濟扎卜之命其誰償之我盡力征討五六年
必滅喀爾喀必擒折卜尊丹巴也今噶爾丹退
回既過土喇往索土謝圖汗職當相機追往於
交戰之前以

勅書授之理藩院以

聞

上諭尚書阿爾尼撒科爾沁十旗所調之兵其綽諾果
兒河所駐之兵應於阿南達未到之前暫留

癸亥

上宴喀爾喀洪俄爾帶青等於紅川時

上巡視口外駐蹕紅川適喀爾喀車臣汗族人洪俄爾
帶青台吉率所屬台吉寨桑等至叩請

聖安

上召入御幄

諭之曰爾喀爾喀厄魯特世世進貢朕心寵眷恩賚
疊加從無偏庇朕遣使往尼布潮地方爾毋達賴
達吉納預備餼糧牛羊以待爾先衆人報厄魯特
橫肆情形又先衆人請安進貢甚為可嘉乃取所
帶珊瑚數珠

賜之復

諭曰此以示朕優眷之意洪俄爾帶青謝

恩出少選

上御黃幄扈從諸王內大臣侍衛八旗文武官員以至
兵丁及外藩蒙古王貝勒貝子公台吉他布囊
等照兩翼坐喀爾喀洪俄爾帶青台吉等坐於
右次大張筵宴

上親賜教漢部落郡王扎木蘇額駙齊倫巴圖魯台吉
安達阿玉璽翁牛特部落郡王畢禮滾達賴貝

勒額爾德卜鄂齊爾土默特部落貝勒額爾德
木圖貝子滾濟斯扎卜喀爾喀部落貝勒羅卜
臧扎魯特部落貝勒扎穆阿霸坡部落貝子車
林董羅卜巴林部落台吉格勒爾圖等飲衆台
吉他布囊等俱就坐

賜飲喀爾喀台吉洪俄爾帶青阿拉卜灘圖巴玖哲
四人亦

親賜上尊并令隨來額爾德尼寨桑等七十餘員至案

前跪飲

丁卯

命派八旗及蒙古兵嚴守邊汛時土謝圖汗與噶爾丹於八月初三四等日相遇於鄂羅會諾爾之地鏖戰三日厄魯特兵夜襲善巴額爾克帶青之營破之喀爾喀屬下諸台吉星散土謝圖汗獨身力弱乃越瀚海奔至折卜尊丹巴所理藩院據溫達阿南達所報以

聞

上諭內大臣國舅佟國維內大臣費揚古明珠尚書阿爾尼等曰今喀爾喀厄魯特交惡作亂境上急宜防守其令現隨八旗驍騎兵丁及下五旗護軍前鋒以其半往駐張家口外形勢之地以聽調遣兩蘇尼特四子部落三旗派兵二千以郡王薩木扎額駙將之貝勒博木卜等副之喀爾喀達爾漢親王毛明安三吳喇忒五旗派兵二千以達爾漢親

王諾內將之於四旗扎薩克內選賢能善於約束者
一人於三旗協理台吉內每旗派出一人副之鄂
爾多斯旗分派兵二千以貝勒宋拉卜將之貝勒
顧祿什希卜台吉阿爾賽等副之此所撥兵俱令
環我邊汛駐備形勢之地再令歸化城兩旗備兵
一千都統阿拉納副都統阿迪等將之於彼兩旗
撥人才雄健善於約束官員即令屯駐歸化城內
以備緊急調遣

聖祖仁皇帝親征平定朔漠方略卷四